



Aalisarnerup nutarterniarneqarnera qanoq naammassiniarneqarnersoq pillugu apeqquteqaat aallaavigalugu oqallisissiaq.

(Inatsisartunut Ilaasortaq Ane Hansen, Inuit Ataqtigiit)

Siullermeerneqarnera

Inatsisartunut ilaasortaq Ane Hansen Inuit ataqtigiit apeqquteqaat aallaavigalugu oqallisissiamik saqqummiussaqqarpoq tamannalu Partii Naleqqamiit oqaaseqarfigissavarput.

Aalisarneq piniarnerlu nunatsinni inuussutissarsiutaapput pingaaruteqartorujussuit, inunnillu amerlanerpaanik inuussutissarsiutigineqarlunilu suliffiuvoq pinngitsoorneqarsinnaanngitsoq.

Aalisartuuneq piniartuunerlu inuuneruvoq ataqqineqartariaqartoq, inuussutissarsiutaavoq inuppassuarnik tunngaviliisoq, pingaartumik nunaqarfinni isorliunerusunilu najugalinnut, soorunami aamma illoqarfinni najugalinnut, ulluinnarnilu ilaqtariippassuit inuuniarnerannut pingaaruteqartorujussuaq.

Aalisarnikkut aqqissuussiniarnerit inunnut attuumassuteqartunut ilaatigut ilungersunartorujussuarmik atugassaqqarfiulersimapput, ilaatigut inuttut naleerutsitaanermik kingunilimmik, tamannalu aalisartumut piniartumullu erloqinartorujussuarmik tarnikkut timikkullu kinguneqartarluni.

Tamassumalu kingunerisarpaa imminnut pilersorsinnaanerat ilaqtaminnullu pilersuisinnaanerat mattunneqarluni unitsinneqartarluni, uffalu ulluinnarni inuussutissarsiutigigaat.

Ulluinnarnimi inuunerminni tunngavigaat, inuuniarnikkummi allamik periarfissaqanngillat, allamik suliffissaqanngillat pingaartumik suliffissaaleqisut taamak amerlatigitillugit, pisortanillu ikiorneqanngikkunik inuuniutissaqanngillat, taamatullu pineqarnissaq inuup tulluusimaarluni imminut ilaqtaminnullu napatitserusukkaluartup kissaatigisarinnngilluinnartarpaa.

Taamatullu piniartunik aalisartunillu periarfissaarullugit allagartaajarlugit inuussutissarsiutaarullugit mattussuineq mitallerneruvoq, inuttullu naleerutsitsinerulluni, piniartuunermi aalisartuunerlu inooriaatsitsinnut ilaavoq.

Taamatut oqaaseqalaarluta aallaqqaasiivugut kingusinnerusukkullu aamma oqaaseqarfigeqqissavakka, taavalu siunissami takorluukkagut tikissavakka neriulluta isummersornermi aamma eqqarsaatigissassanut ilaatinneqarumaartut.

Aalisarnerup nunatsinni inissisimanagera sulii ukiorpassuarni pingaarnertut inissisimalluni inuussutissarsiutitut ingerlassaaq, sulilu inuussutissarsiornikkut aningaasarsiornikkut suliffissaqartitsiniarnikkullu pingaaruteqartorujussuussalluni, taamaattumik ilisimasat ataatsimut katersorlugit inatsisiliornissaq suliarineqartariaqarpoq aammalu tusarnaagassat amerlasuut peqataatinneqartariaqarlutik.

Sinerissami aalisarnerup ingerlanera tamatigullu suliffissaqartitsinermik tulaassisussaataitanermik aallaavilerlugu inuussutissarsiutaanera aalisartukkunnut akisusimaqaaq.

Tulaassisussaataalluni aalisarnek ukiorpassuit ingerlareerneranni kinguneqarsimavoq aalisakkat akii appasissorujussuit atorlugit akilersuisoqarmat, tassami siunissamut ineriartornissamut killeqartitsisorujussuussimavoq allaallu aserfallatsaaliinissamut ajutoornissamullu aningaasanik annerusunik katersaqarsinnaasimangillat tamannalu allanngortariaqarpoq aalisartut siunissamut nukittorsassappata.

Taamaattumik siunissami aalisartut namminnek aalajangersaasariaqarput tunitsivinnut soorlernut tunisissanerlutik imaluunniit toqqaannartumik avammut aalisagartassaminnik namminnek niueruteqarsinnaangorlugit, taamatut periarfissiinissamut inatsisissami ikkussisariaqarpugut, taamaaliornikkut akit pitsaanerusut iluanaarnarnerusullu aalisartukkunnik atorneqarsinnaalissammata.

Tassami ukiorpassuarni aalisartut pinngitsaalillugit nunamut tulaassuisippagut akit inorujussuarlugit akilerlugit, uffalu piumaffigalugit pinngitsooratik nunamut tulaassissasut tamannalu aalisartukkunnut akisusimaqaaq.

Aalisartukkummi namminnek kaasarfimminniit suliffissaqartitsinertik akilersorsimavaat, akit inorujussuarlugit akilersorneqarnermikkut. Imaanniartussaagaluarpormi nunamut pinngitsaalillugit tulaassuisikkatsigit taava akimik annerusumik imaluunniit tapeqartillugit

periarfissinneqartussaagaluartut, piunasaqaruttami piunasaqartoq akiliisussaavoq imaanngitsaq tamanna aalisartut namminneq akilissagaat.

Massakkullu aamma siunnerfigineqarpoq aalisakkanut akitsuutit 50 million koruunit aalisakkanut tamanut atuuttussat aningaasanut inatsisissamut ikkunneqartussanngorlugit, Partii Naleqqamiit isumaqarluinnarpugut sinerissami aalisariutit nutaanngitsut atornerisigut aalisartut akitsuutinut akissaqalernaviannngitsut, pingaartumik akit tunitsivinni taamak appasitsigitillugit.

Orsussap akia aalisartumut nammanniarlugu assorujussuaq ilungersuatitsivoq aammalu aalisarnermi atortut piniutit, neqitassat, sillimmatinut akiligassat, aserfallatsaalinernut akit qaffakkiartuinnarpugut.

Tassuunaannarlu takusinnaavarput akissaqassutsimikkut siunissamut nukittorsarnissaminnut qanoq innarlerneqartigissasut, tassami akilersuisinneqareerput pinngitsooratik nunamut tulaassisussaataitaallutik, akilu piviusuunngitsaq atorlugu tunitsivinniit akilerneqartarlutik.

Tamaattumik akitsuutinik eqqussisoqassappat aalisartut nammineq avammut aalisakkanik niueruteqarsinnaanerata piaartumik ammaanneqartariaqalerpoq. Tamannalu Naalakkersuisut qanoq isumaqarfigineraat paaserusunnarpoq? Akineqarnissaalu kissaatigaarput.

Tassami Naalakkersuisut Siulittaasuata ippassaq tusagassiorfinni oqaatigaa illuatungiliuttut asuli aperiniaannarluta allakkatigut aperisartugut, akineqartartuuguttami inatsisartuni oqallinnermi taava oqaluttarfimmiit qularnanngivippoq apeqqutit ikinneerarsuit nassiunneqartassagaluartut.

Taamaattumik Naalakkersuisut siulittaasuata Partii Naleqqamiit piunaffigissavarput Naalakkersuisunut ilaasortaatitani piunaffigissagai aperisunut Inatsisartuni akissuteqartaqqullugit.

Sinerissami aalisariutit nutarterneqarnissaat aamma annerusumik aningaalersussallugu piunassuseqarnerusariaqarpugut, ukiuni makkunani aalisariuteqarnikkut kinguussaajartuinnarpugut aalisariutinik nutaaliorneq annerusumik ingerlajunnaarsimavoq aalisariutillu nutaanngippallaalernerat aamma aalisartut aningaasarsiornerannut pitsaanngitsumik sunniuteqariartuinnarpoq imminullu akilersinnaanerusumik aalisarnissamut noqitsisuulluni.

Kiisalu aalisariutinik nutaanngitsunik aserorterisitsisarneq aamma sukkanerusumik aaqqittariaqalerpoq, inatsisitaalu piaartumik aaqqinneqarnissaa suliarisariaqalerpoq ukiut tamaasa oqaluinnarsinnaanngilagut aaqqinniartarlugu.

Aasiit massakkut kingumut aatsaat inatsisissaq ukiamut saqqummiunneqassasoq oqaatigineqarpoq aammalu aningaasartai 20 million koruunit aningaasanut inatsisissami peerneqarlutik, naak oqalukkaluarlutik aalisarneq siuarsarneqassasoq aalisarfiillu annertusarneqassasut kisianni aamma tassa kingumut alloriaqqippugut.

Ila killormut ingerlavugut tamannalu ajorluinnarpoq, tassami pisoqqanik aalisariutaatillit ukiut arlallit utaqqipput aalisariutitoqqanik aserortigassaateqarlutik, kisianni massakkut taamaalorsinnaanngillat, tassami aserorterisitsigunik aalisarnermut akuersissutinik piiiaaffigineqassagamik. Sunaana aaqquissuussineq, tamanna akilaarsiuk!

Tassami aalisariutit pisoqqat aserfallalluinnarsimasut piginnittunut akisoorujussuannornikummata nutaamillu angallatitaarniaraluit periarfissaqanngillat namminnermi nutaalioraluarunik akuersissummik arsaarneqartussaagamik tamannalu aalisartut ilaannut assorujussuaq equinerluppoq akuersaerneqarsinnaanngitsoq.

Aamma aalisarneq ingerlalluassappat imaanngilaq aalisariutit kisiisa piorsarutsigit pitsaasumik angusaqarsinnaasugut, tassami qanorluunniit nutaatigisunik aalisariuteqaraluarutta tunitsivissaqanngikkunik ingerlasinnaanngillat, tassami ilimananngimmat tamarmik aalisartut avammut toqqaannartumik niuernermik ingerlataqarsinnaasut.

Taamaattumik aamma tunitsivitigut pitsanngorsaanissaq pinngitsoorneqarsinnaanngilaq tunitsiviit nunaqarfinni matoqqasut ammarneqarnissaat Naalakkersuisut aqutissiuttariaqarpat, tassami nunaqarfinni najugallit aamma imminnut napatillutik aningaasarsiorsinnaanerat ammaanqartariaqarmat.

Sinerissami aalisarnermi raajartassat amerlineqarnissaat aamma kissaatigaarput, sinerissami pisassat kiisalu avataasiortut pisassaasa nalileqqinneqarnissaat piumasaraarput, tassami sinerissami inuusuttut raajarniarusuttut periarfissaat pitsaanerulissappata qangalili aalajangersagaq aamma avataasiortunut 57.pct taavalu sinerissami tulaassuititaasut 43.pct allanngortinneqartariaqarmat, tamannalu aalajangersagaq illuanut saatittariaqarpoq.

Raajartassallu avinnerat sinerissamut 57 procent-ingorlugit raajartassat aaqquillugit qaffanneqartariaqarput anguneqartariaqarporlu, tassami aalisartunngorsinnaanermut periarfissat pitsanngorsartariaqarput angallatillumi nutarterneqassappata aamma pissassaqarnerugunik

ingerlalluarsinnaanerussapput, tamannalu tamakkiisumik KNAPK-imi kissaatigineqartoq naammassineqarsinnaanngussagaluarpoq.

Taavalu tunitsiviit pisortat pigisaat Royal Greenland namminersortunngorsartariaqarpoq, tassami tulluannigilaq pisortat pigisaannik aalisarnikkut tunitsiviit namminersortunik pigineqartut unammillerneqassappata ilaatigullu allaat ipitinniarneqartassappata, tamannalu namminersortunut unammilerujussuarneq unitsinneqarluni allanngortinneqassasoq Partii Naleqqamiit piumasaraarput.

Tassami pissusissamisuunngilaq namminersortut aalisakkeriviutillit nutaamik aallartittullu unammillerujussuarlugit pissusilersortarneq akueriinnarneqarsinnaanngimmat. Sumiiffiit ilaanni akit qaffasissorujussuit atorlugit akilersuisarput, tamannalumi ajorinngilarput, kisiannili taamatut unammillernerminni aalisartut allat akiluttorfigalugit pillutik unammillertimittut isigisaminnik nutaamik aallartittunut pisortat pigisaat ipititsiniaasarnerat akuerineqarsinnaanngilaq allanngorluinnartariaqarlunilu.

Raajartassanik piginnittuunerup allanngortinneqarnissaanik Inatsisartuni oqallittoqarnerani pisassanik utertitsisinnaanermut tunngasut Partii Naleqqamiit isumaqatigalugit oqaatigereernikuuarput, taassumalu suliarineqarnissaanut qilanaarluta utaqqivarput oqallinnermilu peqataanissarput pissangalluta utaqqissavarput.

Aalisarnikkut pisuussutitsinnik pigisatta tamakkiisumik maani nunaqavissunik pigineqarnissaat apeqqusinnngivillugu kissaatigalugu piumasarigipput Partii Naleqqamiit oqaatigissavarput.

Kissaatiginngilluinnarparput Partii Naleqqamiit pisuussutinik uumassusilinnik nunanik allamiunik piginnittoqalernissaa, uagutsinnut ineriartortinnissatsinnut mattussorsinnaanngilagut, tassami inuusuttorpassuit aalisarnermut pularusukkaluartut periarfissaqartinnagilluunniit pisuussutigut nunat allamiunut tunniussorsinnaanngilagut.

Aammalu kilisaatini aqumiut nunaqavissunik inuttalersorneqarnissaat ilungersuutivillugu Partii Naleqqamiit piumasaraarput, ajornaqaaq maani sulisinnaasut pigisagut atornagit allamiunik atuinersuarput allanngorluinnartariaqalermat, Naalakkersuisut apererusuppagut taamatut anguniaqarnissamut peqataaniarnerut? Taamaattoqassappallu qaqugu aallartinniarnersusi paaserusupparput.

Ulluni makkunani assut ajornartorsiutaasoq tassalu saarullinniarnermut qaleralinniarnermullu akuersissutinik aalisartunut tunniussiumanngilluinnarneq sooq taamaannersoq Naalakkersuisunut

apequtiginiarparput. Tassami akuersarneqarsinnaanngivippoq allamimi najukkaminni inuussutissarsiorfissaqanngillat pingaartumik nunaqarfimmiut isorliunerusumilu najugallit eqqarsaatigalugit, tassami suliffissaaleqisorpassuit pigaagut suliffissaqanngivissut, ilaallu suliffissaqalissagaluarput aalisarsinnaanermikkut ammaanneqartuugaluarpata aalisartuuppummi piniartuullutillu.